

Historia di bak'i salo na Aruba



Na Aruba tabatin algun bak'i salo, uno na Savaneta, Rancho y Malmok. Ta for di 1918 salo tabata wordo usa pa sala cuminda. Pero for di tempo di Pre-Columbia, prome cu e tempo di Indjannan legitimo a bin establece na e Peninsula di Paraguana, Venezuela, e salo tabata di importancia pa nan pa preserva nan cuminda. E Nos por lesa cu den añanan

50 A.D., e Cacique Arua, su yiu y dies guerero tabata nabega pa Cujarao (Corsou) y Bonaite (Boneiro) pa bay busca salo. Di regreso, nan ta perde rumbo pa motibo di un tempestad, y ta termina na Aruba.

Pa Savaneteronan, e banda di lama ta conoci como Saliña, unda tin e bakinan di salo. E tempo ey e bakinan aki ta yena cu salo door di e circulacion di awa di lama pa e bakinan. Tabatin un tubo grandi cu tabata core for di lama bay nort y pasa bou e caminda pa e saliña.

Tempo di gobierno di PPA, un gobierno cu tabata e pionero den nos turismo bou comando di Juancho Irausquin (qepd). PPA su maneho tabata dedica na diversificacion y mehoracion di nos producto turistico incluso personal, hotelnan, nos infraestructura, servicio y un mercadeo dirigi. Den e cuadro aki PPA a mira e necesidad pa traha un area turistico chikito na un beach chikito y bunita rondona cu matanan di mangel. Nan a instala hutnan di palo y rama. Hopi turista y localnan tabata pasa dia den lama of pisca na e luga aki, net pabou di e bakinan di salon a Savaneta. Enberdad el a bira un luga masha bunita cu su parasolnan, pero lastima cu tempo a wordo destrui.



Durante construccion, nan a elimina e tubonan, y esey a stop e circulacion di awa pa drenta y sali. Un tempo e bakinan aki tabata produci hopi salo limpi cu e hendenan tabata usa pa sala of preserva nan cuminda, pasobra no tabatin frishider. Ta na aña 1929, Sr. G. de Veer & Sons a trece e prome refrigeradornan marca Frigidaire na Aruba. Su tienda tabata den Hendrikstraat na Playa. Te awe aind nos hendenan ta yama tur refrigerador "frigidaire", of te hasta na bon Papiamento "frishider".



No a mantene e bakinan aki di salo bon, di manera cu actualmente ta solamente sushi tin den nan cu hasta ta produci holo desagradabel. E luga unda e bak'i salo ta situa tabata pertenece na Sr. Jacobo (Koochi) Croes, doño di La Bodega na Playa, un hende cu tabatin manera pa paga hende pa mantene e bakinan un tempo.

Na juli 2011, Parlamentario Sr. Donny Rasmijn, a tree dilanti cu e saliñanan di Aruba mester haya atencion di gobierno specialmente esun di Savaneta. Na varios ocasion a discuti e problema aki cu e habitantenan cu ta biba banda di e saliña. Segun gobierno, antes e saliña tabata un bak'i salo (zoutpan) y despues cu el a wordo bandona, e tabata un luga di habitantenan, specialmente e muchanan tabata haci uso di dje. Pero e saliña a perde circulacion di awa cu e consecuencia cu e awa a putri y a trece un holo desagradabel den e bicendario. Tambe e saliña a bira un luga pa sangura y ashibi broei cu ta trece molester insoportabel pa e habitantenan. E situacion a bira hopi fastioso pasobra constantemente e habitantenan ta den guera cu e insectonan aki. Insecticida mester wordo usa diariamente pero ta afecta salud di e habitantenan. Esnan cu sa, hopi yiu di parha ta muri den nan neishi durante e fumigacion.

Segun Sr. Rasmijn, si nos wak e luga bon, nos ta papia di un luga cu tin potencial pa bira un atraccion pa e habitantenan, pueblo di Aruba y e turistanan. Na prome luga mester sana e saliña door di saca e lodo putri y contamina cu tin den dje. Despues mester habri dos boca, uno pariba y e otro pabou pa asina e awa por circula libremente den dje. E resultado di esaki ta cu pisca por broei atrobe den e saliña. Un tempo, ora tempo cambia, hopi parha/pato di Venezuela ta bin eyden. E muchanan por gosa atrobe di un saliña limpi cu por funciona como un piscina. Por bin cu un proyecto di marina y recreacion pa nos hendenan.

Na Aruba tin varios saliña y esunnan mas conoci ta esun di Savaneta, esun den becindario di e hotelnan y Malmok. Tur por bira atraccionnan enbes di ta un molestro pa nos hendenan. Ta hendenan cu ta biba den e areanan aki por ta testigo di e tantisimo molestro cu nan ta sufri tur dia. Abo lo kier biba den un area unda bo no por tin e tranquilidad ni paden of pafu di bo cas of biba sin e aire fresco door di bentananan sera? Por ultimo Sr. Rasmijn a trece dilanti

cu como representante di pueblo ta su deber di sigui insisti cu e salinanan aki mester haya e atencion necesario pa caba cu e molestro cu nos habitantenan ta biba aden.

Na Rancho tambe tabatin uno. E salina den becindario di Paardenbaai unda tabata saca salo for di lama, tabata un fuente di entrada cu tambe por ta otro indicacion di e origen di Rancho. E indegina di Tera Firme tabata conoci y a usa salo pa conserva nan pisca. Tambe e coloniado riba su biahenan largo di un continentne pa otro buscando rikesa tabata haci uso di salo pa e mesun motibo. E salo aki tabata hopi aprecia na Europa unda por ehempel e Hulandesnan tabata usa hopi salo pa sala nan haring pa conserva nan.



Na Malmok tambe tabatin un bak'i salo. E salina pabou di Bakval tabata produci salo pa exporta via Malmok (yama Rede). Aki basta barco tabata hancra. Hopi tabata bin hancra eyman dilanti di Malmok, caminda awa, cabrito/salon, cuminda y salo tabata wordo entrega, via boto di rema pa tripulantenan di barco di West Indische Compagnie. Riba baranca di Malmok, pazuid di Boca Catalina, tabatin un Loods/Kantoor di Douane, pazuid di Faro California tabatin pos pa awa dushi y baki grandi pa cabritonan. Na e barancanan di California e cabritonan ta drumi, Pariba di Malmok tin un cas tipo bieu cu a fungi como un "opzichterhuis" y mas pazuid tabatin un plantage (awe un villawijk nobo), pues panort di Bakval.

Dufi Kock
Escritor y Historiado